

漢丞相諸葛忠武侯集敘

義垂髫時父卽示以祖長史公與伯父大行公所手鈔漢相忠武侯公書長史公題其簡末云兵燹遺軼欲編彙成書未能也義受而藏之崇禎壬申承督臨庾適弟倬自白門購書十餘篋來因得茂苑楊去奢所集忠武侯公書乃慨然謂倬吾祖與伯父雅有志而未逮者父以屬我今當相與成之楊本列年譜傳畧紹漢連吳等曰自云承於婁東王岡伯較之家鈔舊本互有存遺楊謂陳承祚所載侯開務作牧諸篇而裴松之註時時引侯集今俱不可見此蘇東坡葉水心俱有不見全書之恨若心書將苑梁父吟黃牛廟記爲後人僞作概去不錄茲集惟年譜

道藏輯要

忠武侯集

一 星集一

仍楊之舊餘依家本傳用陳志而節錄諸傳附之次遺文次遺事陣圖次遺蹟亡者旣無從攷存者亦不得遺概晉唐以下詩賦論贊碑頌巨公文人之筆異同之論咸竝載之間有未備俟之他日凡爲卷二十有三十六萬三千六百有餘言弟倬曉夜搜討叅攷羣書精意較讐庶無掃葉之嘆而義於糠粃斗斛之暇亦輒共編訂遠聘吳中善手付之剞劂兢兢庶詳且慎焉夫去奢岡伯以論世好古採綴研核其言曰追惋散軼彌深豔羨欲用以弘濟世業勸獎忠孝况爲之後人乎書成更附宋祖少保公及祖長史公二傳於後寒家系自蜀派宋紹熙間祖諱安節公爲福建轉運使始家福建四傳爲少保兵部尙書公諱廷

瑞去侯二十二世又十二傳乃爲祖長史公諱應科家世頗有
顯者世次傳誌甚詳而獨附此一傳則以忠孝之道奕葉之不
墜如此夫論世好古者尙欲勵之天下後世又况淵源可邇弓
冶世承而爲之後人者乎幾倬撫卷之餘其交相勛勉以勿替
祖德而毋負庭訓云

崇禎壬申十一月二十六世孫義頓首謹序於臨庚之公署

道藏輯要

忠武侯集

二

星集一

忠武侯像

